

師

伏

堂

詩

草

師伏堂詩草卷三

善化皮錫瑞鹿門

由杭州往金華舟過富春江

以下庚辰

宛宛春草碧依依新柳舒帆風晚驅鷺鉤月夜驚魚倚伏竈前算
飄淪任太虛客途心轉曠聊託不材樗

千峰隨棹轉兩水勢爭驅客意憐芳草春光到碧蕪沙明微月隱
雲斷晚煙孤達者鴟夷子曾聞泛五湖

江上

沙痕上岸將粘樹石齒排流欲齧船霜鬢每從江海變客心長與
釣臺懸驚新物候非前日眺遠煙波似昔年暮色滿天羈思積不
堪重問舊山川

蘭谿晚泊

長途初繫纜夕景始流川孤月時隨棹寒星夜近船客懷凝遠望
歸路託蒼煙豈必江山異羈懷倍往年

山行

平蕪與岸柳一色共青蒼鳥道盤深翠人行背夕陽路從羣峭入
歌徹遠天長所惜韶光老空懷衡杜芳

題畫梨花

故園春色應零落空向圖中覽物華卻憶昔年寒食夜小窗微雨
夢梨花

初夏

稍稍綠鬢微微青上襟朱明甫改候碧樹已濃陰殘花歇鶯語
垂柳促蟬吟青紅方換采蟲鳥復殊音久客惻物變褰帷步芳林
焉知異候景復引傷春心鼻感謝識氣耳悲陸驚禽龍鬱不可挽

鶴髮漸將侵何以駐顏願言託陸沈方將餽丹石聊試變黃金
僑居金華物候殊異蟲鳴獨早聞之慨然

夏蟲作秋聲鳴蛬亦弔月雨餘氣更激日晚音未歇繫彼微物意
乃知應時發喧噪復何爲生機固難闕乾坤老元鬚霜露變金骨
鷗蟀倏代遷鳥兔紛出沒天高難爲陳川廣不可越空驚聲斷續
獨生意超忽

園林雨後

積陰屯層崖風回觸雲起餘滴潤新葉宿露明花蕊樹古餘青暗
春殘亂紅委鳴鶯來何時芳草尙未已龍戰分古今鱗運周終始
安知閒居心坐拊英雄髀高吟梁父樂酒師栗里願言愛景光
毋徒惜芳芷

由婺往宣平道中作

高山摩蒼天浮雲截其半青白光相繚明昧影忽亂苟非狂飄發
竈見宿霧散開霽知有時彷彿駭殊觀天連密樹遠岸擁枯查斷
濃陰垂霧縠怪石切雲冠前瞻欲迷途側顧驚無畔方知乾坤大
頗覺耳目換

山中早行

客路指殘星雞鳴客驚寤捲簾識微明落月猶在樹近嶺方見山
戒途始辨路行人立翠微皎若沙上鷺早歲迫奔營窮年困馳騖
搖我箕濮情豈云操不固方尋禽向契思共求羊步獨往意多傷
同心安可遇

感伊犁事

甌脫河源外窮邊渤海西忽聞歸使節未必免征鼙詎憶華亭鶴
徒驚中夜雞滄溟幾萬里何處塞丸泥

北海羣羊在南旋匹馬來王烏何太詔傅監豈無才獄吏今方貴
行人亦可哀盧龍將盡賣詎止棄輪臺

老將威名舊孤軍轉戰勞勦頭方報捷結骨更爭豪血濺烏孫馬
光寒大食刀班君有奇計虎穴鬪應塵

詭道防奔突先聲恃折衝沿江裝水馬橫海走黃龍大漠朝馳檄
甘泉夜警烽東南民力盡莫更困三農

行路難十八首

奉君端溪之石硯海南側理之華箋斑管五色之毫翰黃山千載
之松煙寫我一篇詩名爲行路難歌之落落天風寒飛鳥徘徊不
得下鳴蟲切切爲心酸久客聞之共哀歎君不見韓娥秦青善歌
者曲終四座皆汎瀾

暮春三月花芳菲江南草長蛱蝶飛盛時一去不復返王孫遊兮

胡不歸黃金臺上生蒿萊駿馬之骨今成灰夜光千金方按劍僕
僕道長何爲哉上有白頭下黃口毒蛇在前猛虎後嗟君犯難走
關山嗚咽辭親覓升斗升斗之祿皆由天勸君還轅惜少年
君不見天上月朔望隨時異圓缺又不見林中花茵溷隨風墮天
涯花月由來不長好人生百年寧自保綠陰滿地春光老杜鵑啼
紅落芳草仰屋千秋誰復知眼前一杯須及早古今茫茫貉一邱
身後賢愚安可考

長安大道交朱輪五侯七貴何紛紛攀龍競趨田竇第羅雀誰問
翟公門約誓皆言共生死一時意氣干青雲道逢輕薄兒光耀何
炫赫彈鋏曳長裾云是朱門之上客却笑寂寂揚雲宅草元五千
空尙白

門有車馬客問客從何來客言自故鄉故鄉今日何如哉答言舊

家日零落昔時耆老多摧頽朱門大宅生蒿萊鄉里小兒駟馬回
古來陵谷有遷變何況貴賤還相推日暮登高望故國春花落盡
定王臺

君不見建章宮千門萬戶生悲風又不見銅雀臺總帷幷幹凝塵
埃當年歌舞窮朝暮此日荆榛走狐兔磨劍公然敢上陵奏伎何
人猶望慕一世之雄安在哉樵夫牧子紛紛來富貴繁華有銷歇
何論下士終蒿萊

今人所見非古人古人之道成灰塵已聞著書覆舊瓿復見論語
燃爲薪操瑟齊門向誰鼓校書馬隊亦已勤弱冠觀羣書抗心在
千古篋藏鉛刀不一試久事筆硯終何補君不見孟荀窮老客諸
侯勸行王政皆掉頭道高天下不遇時何況馬卿翁子徒工辭楊
意不逢莊助死滌器負薪誰復知

我欲學仙鍊金丹長生久視留朱顏安期騎鯨走東海船交海中
風引還天門蕩蕩深九關白雲遙遙不可攀黃庭中人秘真訣安
能白日生羽翰金華牧羊兒乘龍上仙山竦身雲霄杳然去回首
笑我猶人間

投我手中筆繫我腰間刀回頭別鄉里從軍意氣何雄豪借問此
何爲答云方徵兵徵兵遠向烏孫城甘泉宮中報烽火漢胡方作
伊吾爭懸度繩行數千里頭痛身熱黃沙起火山煙雪嶺水從軍
之樂乃如此但願生入玉門關鏡歌遠唱征人還

一談賜黃金再說酬白璧生無二頃田且作遊說客楚王不悅又
秦王江海馳驅道路長說行金多炫鄉里勢位富厚誠難當張儀
老逐蘇秦死說難愁煞韓公子母爲謀府與名戶行人失辭國人
恥誰云一怒懼諸侯却恐橫屍向都市

憑高眺八極八極何茫茫大瀛環九州巨浸稽天長中有秦王所
鞭之巨石穆王所駕之鼈梁吾聞古化人乃從西極來飄然直上
中天臺力反山川移城邑變形易慮何奇恢清都紫府默存耳頃
一刻萬里幾神哉神遊之樂不可久君不見王母今白首青鳥西飛
竟不歸戴勝獨處亦何有天風浪浪海蒼蒼誰騎紫鸞向扶桑

按劍夜嘯天風哀仰首大呼陰雲開吾聞大荒西去一萬里彎弓
猶避軒轅臺軒轅之臺高百尺中有黃帝神靈宅赤縣神州渺何
許不過滄溟一拳石君不見五山乃在歸墟中金玉爲臺珠樹紅
禹彊仰戴六鼈極仙聖往來蓬萊宮人言海上來海淺揚塵滿岱
輿圓嶠淪中流帝怒龍伯使之短西方何人獻玉琯

莫放海東鷹肅慎矢不登陳廷莫乘西極馬大宛頭未懸母寢東
西萬里塵沙黃極邊處處鄰虎狼鑄銅爲界豈足恃樹枳作籬安

可防拔劍四顧心旁皇蹙蹙靡騁向何方吾家乃在洞庭之南百
餘里中有秦人之故址問津惟見桃花水

匣中五銖錢云是漢家之所鑄令人却憶西京時寶玩徘徊不忍
去伊昔漢家全盛年錢室金堂高比天太倉紅腐不可食水衡貫
朽難更穿票姚封狼居博望通西極靡財若泥沙賜予動千億昔
何富盛今何貧告緝權算無餘力治日苦少亂日多盛年一去將
如何

黃河一千年一清安得躬逢聖人生老死不見兵與革嬉遊鼓腹
歌承平昔有放勳御黃屋十日並出民人驚后羿彎弓射不得大
風鑿齒方縱橫洪水湯湯浩方割橫流地上龍蛇行黃農忽焉沒
天地皆荆榛生逢堯年尚如此何況我輩今之人

浮雲上天如白衣世事安能無轉移昔聞王侯變編戶復有權貴

相爭欺君不見齊國吠敵禽曾爲晉國宗廟議人之化也亦何日
詎憶曩昔繁華時今日白鳥呼門上昨朝燕雀處堂嬉安得一世
至萬世延年千歲長熙怡

君不見五城十二樓上有仙人遊仙人縹渺乘煙鴻金屏繡幕圍
春風誰家女兒美如玉芳顏灼灼桃花紅玉帛無時盛年往嬋娟
遲暮誰與同一彈瑤瑟不得語獨掩羅襟淚如雨人生際會皆由
天命實不猶奈何許我作男兒猶齟齬况爾苦相身爲女

章甫何爲適諸越獨倚南天歎明月月明千里關山別憂從中來
不可絕道路逢故人勸我愛青春終年轄軻守賤貧何不早據要
路津我言富貴不解憂矧彼富貴非可求長沙太傅哭湘水猿臂
將軍老不侯我今何言君且休

葦風

獵獵葦風迺鱗雲靜不流船脣齧石齒舵尾接濤頭歲月催黃葉
生涯寄白鷗吾心若止水與世任沈浮

魚風腥入夜蟹火碧連村遠水明如畫殘陽澹掩門天光到瀨窄
湍勢挾山奔忽動思鄉感前宵夢故園

泊錢塘江

初月與殘陽西方互生落夕氣橫陰崖晴光赫陽壑潛魚媚寒波
小鳥翔寥廓羣物各有寄孤營竟焉託生平湖海氣奔走日銷鑠
其如江行夜復此寄孤泊

登吳山

朔風千里飄行舟木脫波起霜天秋荷花桂子已零落更來吳山
頂上游錢江日夜奔東海難與胸中消磊塊聖湖勺水足勾留白
蘇諸公竟安在當頭萬瓦紛鱗鱗大裘誰覆杭州人黃巾赤眉兒

戲耳至今城郭多荒榛一波未平一波伏自昔滄桑如轉轂金牀
免去白鴈來此山興亡猶在目宋帝宮中秋草荒錢王祠畔野煙
黃赭龜潮頭射不落江流海氣交青蒼海中長鯨作人立江上樓
船夜馳檄登高弔古復傷今萬感茫茫乃交集天吳移海海水枯
鐵弩射江江神驅烽火之驚何代無青山歌舞胡爲乎君不見完
顏欲立吳山馬采石神兵自天下匹馬隻輪無返者

過七里瀨水甚湍怒

青山如龍勢蜿蜒兩山夾水爲通川水石相雄不相讓飛流噴沫
成驚湍碎如烹茶半熟瞬眼沸急如飛雨亂落明珠圓密如麻姑
遊戲散擲米細如淵客夜泣爭傾盤大珠小珠滿空灑光明錯落
不盈把六年風景若初逢可惜光陰如走馬對此百感從中來悲
風吹散千瓊瑰昔人持竿釣東海今我僕僕何爲哉我有敝廬倚

山麓夜聽流泉撫松竹男兒生不成名隱亦足枕石高眠看飛瀑
復過客星山

雙峰夾江似無路片帆飛過峰頭樹豁然一轉天忽開船到灘中
最深處荒臺百尺枕江干明月壓船江水寒不見客星明厯厯客
星墮地化爲石

宿鳥

宿鳥聚江舟饑鷹掠亂流天低雲霧樹沙退草生洲牛渚徒高咏
文園久倦游聊將小海唱和彼越人謳

歲暮

滾滾年華逐逝波悠悠道路奈愁何嬾闊久已通蠻語却曲憑誰
苔楚歌細雨梅花鄉夢遠春風楊柳別懷多滄江歲晚空高歌好
爲元真辨釣蓑

開俄國和議成有感

列朝聲教被雕題萬國梯航進象犀票騎豈忘收幕北鄰侯終不棄安西兵機敢勾秦人馬使節當同屬國瓶漢給南庭嘗鉅億未妨金帛畀梓翠

萬里長城亭障虛引弓冠帶各安居從來漢帝如天量不較單于尺二書邛竹爲誰通大夏金人終擬獲休屠羈縻自是明王誼辛苦通侯下錦車

大江以下辛巳

大江流不已吾道竟如何雲外孤帆遠春來芳草多壯心空渤海歸夢渺煙波裏晨高霞映故山間綠蘿

贈張伯輿紀詒

執手武林道相逢平子賢推襟偏異地交臂惜當年海靜春歸柳

江空月墮烟晴窗同賞析珍重白雲篇

望古初心在逢人直道難孤懷自龍蠖六合幾梟鸞璞玉勞三獻
塵纓繫一官誰知謝安石才大固槃槃

樞曠思青草山猿怨綠蘿吾徒生憾晚天意竟如何茅蕙遷流易
於苗倒置多冠雲與被月濁俗且揚波

人世嗟予拙言詩佩子規論才隘宇宙抱德學支離客路眷光老
吳山霸氣衰那堪折楊柳遽別浙江渭

楚湘賓館古梓詩二十韻和趙伯藏

于密

張伯輿作

莽蕩吳山曲飄零楚國材攀條情感概肇幹勢崔嵬凍雨堅奇骨
仙雲護古胎蒼埋上代雪黑走太陰雷拔地彪橫躍翻風鶴倒回
青牛夜魄化白鵠海天來寶柱森秦殿金盤鬱漢臺江湖任搖落
霄路但徘徊木魅毫頭鬪山精匠石猜心空籬鳳泣鱗鏟老龍哀

悽愴當年柳婆娑此樹槐殘枝墮雀影碎錦蝕蠟苔赤汁創流血
黃巾刦換灰蕭條染棟具指柱井垣頽桃實春秋記桑田舍館開
鬼工剝造化神力掃氛埃蟻國人酣夢犧尊木避灾寵榮題大筆
吟撫認枯荄歲月靈根鍊乾坤正氣培君看杜陵橋翹首向蓬萊

伍公廟

錢江湯湯萬馬奔中有千載靈胥魂頽雲黯沈白日落素車如雷
走海門潮頭轟起一千尺終年怒打句踐宅鳴夷鐵骨死不磨涌
出吳山一卷石挾弓怒射山爲開飲劍投江江倒回東門懸目死
不瞑含愁遠望姑蘇臺寒鴈夜泣空山雨遺像英風尙如許廟門
未鏽費與鼯廟食猶從漁與女萬古耿耿惟恩仇復仇大義書春秋
試看銀山一片海上浮朝轟夕捲無時休我來獨立吳山頭作
歌弔公公少留神旗獵獵山風愁

旌功坊

虞淵曰沈天柱摧髑髏夜泣胡沙埋龍鼈無梁鶴蟲化穹廬酒熱
青衣哀八駿不歸胡馬來風塵欲暗黃金臺百官頸縮眾魄墮塵
戈返日何人哉錢唐司馬真健者手挽乾坤奠宗社喪君有君春
秋義將軍秉鉞從天下老罷臥道貉子驚上皇歸馬千官迎山河
重秀天地清微公何待啟與禎南遷誤國徐有貞有貞不死公不
生奪門爲功定國罪目夷瑕呂寃難平旌功坊字鐫天語諭定貞
珉自千古大鳥魂歸尚飲冤太牢死祭終何補伍公山下天蒼涼
杜鵑血灑春花香望公九原不可作巍峩但見當時坊坊巍峩字
不減少保尚書名烈烈慘淡西湖埋碧血

小青墓

鶯血啼紅墮煙渚古梅萬樹泣春雨空山不返美人魂紅心草長

埋香土妬婦津頭風倒吹璧月損豔星沈輝楊枝拜佛嗟無力皂
袞何人爲解圍宦作霜蘭不風絮恍慨陳辭向誰訴鳩鳥朝啼悔
作媒倉庚夜泣難醫妬月魄暗死春華殘落英滿山古柏寒幽魂
獨抱女貞樹放鶴亭邊跨鸞去

蘇小墓

春風不暖夜臺下鬼郎夜跨青驄馬油璧車聲走班班仙倡帶月
過湖山大堤草涴裙腰綠褰帷獨歌金縷曲桃花落盡春光癡香
魂化蝶飛上枝流鶯自歌燕子舞慕才遺蹤足千古荒亭永闕煙
波寒松柏青青怨風雨

錢唐歸舟

短棹擊寒星宵行入杳冥川光夜白草色渡江青鴻爪來時路
鵠聲獨夜聽蟬媛應歎息極浦更揚靈

暝色

暝色萬峰來孤城背水開風高仍繫纜春老莫登臺落日光難定
荒江響易哀沙禽爾何意欲去更徘徊

客愁

客愁如岸草一路共萋萋春老游蜂去人歸杜宇啼帆懸落霞外
天帶夕陽西寂寥袁臨汝租船句懶題

舟中有載牡丹花者嗟其託根非所遇同羈人書以誌感

江淹變春聲風雨叢羈思同舟雜蘭鮑一阜含牛驥混迹憐孤客
託根復奇卉芳名記洛陽俗目昧姚魏繁華滿園林嗟爾獨憔悴
茵溷本從風薰猶乃同器馨烈誰復知名高反爲累移植倘有遭
餘春尙明媚

送黃鈞夫歸湖南

正是橙黃橘綠時
別懷惆悵曉風知
秋山數點橋頭路
霜滿寒江鴈影遲

秋暮復有杭州之行

青山若故人遙遙舊相識如何將歲暮復此西行役
金風催朔氣玉宇變秋律歲月曾幾何江清見石出朱華改
春榮丹葉移霜質人生非卉木飄搖迫憂慄所懷在商顏望古慙衡泌隕霜恐虛言
回光豈異術寒江感羈旅慨焉若有失

江行偶題

西山老蕨薇東國飄桃梗其如目憐心徒使形贈影平生慕禽向
有志切箕願聖道一龍蛇羣言雜蛙磼惜哉風波民宿願不獲騁
竭來遠遊賦復此文身境水隨舟共高人與石爭猛流光逐餘青
送睞惜去景表靈高自極感物心彌警萍轉乾坤間母乃滑吾靜

錢唐江

潮長壓山低遙天兩岸齊人行入葭葦舟過亂鳬鷺帆轉衝雲上
江流帶日西朱公慨歧路吾道豈終迷

感懷同伯輿作

誰將椎鑿破鴻濛欲斷神鼈繳大風蠻觸地爭蝸左右鱣鶼貢入
海西東八溟龍戰元黃血十日鳥驚震憲弓員嶠岱輿今在否仙
人遙望蜃樓紅

彗星高出掃鯨鯢蚌蛤光搖漢月低盜璧客歸生掉舌舞千尸變
死張臍幻人吐火妖含霧祆廟馮身氣化蜺莫徙盧山墳赤縣犁
軒猶在大荒西

虎豹天門誅蕩開蛟龍池水鬱風雷神依赤日揮戈起夢挽銀河
洗甲來滄海鞭回秦帝石中天搥碎化人臺金城萬古長沙策五

餌當年只費才

懷中五色石珊瑚匣裏雙鉤劍氣寒
俑始猶龍談道德機心鉅子
啟兵端驚呼廣樂醒天醉化作冤禽塞海乾
巨浸滔滔日東瀉中流何衝障狂瀾

桐江

急湍送流年奮迅若奔箭葉飛山骨露水落石齒見春草不留青
霜林已改舊人非金石姿覽鏡惜容變千秋願未償四海遊方倦
繩彼釣澤人徒懷臨淵羨灘聲吼驚眠瀑影飛搏面此險何數乘
窮途一身賤

過桐廬

孤城插斗星橫北江水浮天日向東回首鄉關雙尺鯉側身人海
一冥鴻山庭蕙帳荒蕪後波路蒲帆蕩漾中最苦風塵添白髮不

堪霜雪對丹楓

富春江夜行

寒霜兩岸沈魚影柔艣三更壓鴈聲山色遠垂天目乳江潮不過
富春城半帆落日陰暉變萬里長風波浪生挂席東南獨來往孤
槎朗朗客星明

嚴江始發時將北行入都以下壬午

山雲眠未起客棹已先征遠水兼天曙疎星替月明村雞斷夜色
江鳥變春聲歡聚猶如昨辭家又幾程

舟過嚴州

晚泊東關第一程春風嫋嫋片帆輕如何解纜嚴江夜已有催歸

杜宇聲

題春宵聽雨圖

碧桃開過杏花殘
檐溜三更到枕寒
祇恐明朝花又落
夜深先起捲簾看

博山煙燼一燈明
紅雨香飛怨曉鶯
應憶西窗同翦燭
夜來風雨打窗聲

出都寄程伯翰同年

頌藩

久處難爲別
羈孤易警秋
一辭燕市飲重泛
越人舟
聚散宦天意
縱橫鬱古愁
著書應未晚
感事莫深憂
不待登高去
先從遠道還
黃花應笑客衰
柳不堪攀
魂夢楓林外
寸心天地間
殊方憤眠食
留取舊容顏

津門望海有感

排雲仙鷺上蓬萊
回望若蒼海似杯
珠玉早傳瓊島樹
金銀還接化人臺
東方幾兒蟠桃竊
五利方持巨棗來
肯信滄桑有遷變
天

邊黃竹莫輕裁

漢皇壇壝徧山東海上求仙此路通青鳥使歸憑寄語白茅人貴
竟何功上元玉佩臨風冷王母雲旗映日紅曾見安期丹訣在千
門遙隔建章宮

夜泊

隔岸懸孤月澄江影萬星山移知棹轉水靜覺舟停湖海能無意
文章尚有靈茫茫望南北漂泊似浮萍

夕陽

夕陽來隔岸的的向波明水落沈魚夢天高縮鴈聲離憂荆楚客
懷古富春城豈獨傷遲暮庭闈白髮生

桐廬

極浦緝高錦樹秋此身真擬老滄洲聲名白昔稱龍尾勳業於今

愧虎頭萬里江湖常作客百年世事獨叢憂結廬思傍桐君住不見仙人十二樓

題金陵曉嵐圖

大江直下秦淮東鍾山矯矯如蟠龍山勢西來水東下建業形勝
東南雄江山不異風景異板橋流水長干地南朝佳麗付煙銷六
代繁華如夢寐金陵自古帝王都金粉飄零見畫圖苦霧全沈江
令宅餘波尚湧莫愁湖潮打空城已陳迹惟有青山尙如昔曉來
嵐氣化江煙倒射石頭城下石何當挂席江風酣與君攬勝話江
南無情莫問臺城柳但看圖中百尺嵐

金華

八韻樓高接九霄東陽形勝自南朝山環四境開雄郡水抱孤城
撼石橋懸象豈眞明婺女牧羊何幸廁仙寮高風千載山栖志辨

命宦須歎孝標

禹陵四十韻

聖蹟傳三代神封合萬靈古音通會計明德式芳型玉帛羣侯觀
櫬橋此地停石船名恍惚金簡字瓏玲舟負黃龍避書披白馬刑
鴻流一以澹蚊息自茲塗相柳臺三仞開山土五丁握璇宏括地
秉鉞肅來庭弓劍方藏穴衣冠或象形忘歸覩奇麗沒世薦芳馨
鏡沼青縈草爐峰翠列屏化熊留廟宇耘鳥闕畦町松老虹翔棟
窗虛蜃夾襦黝牲宜獻俎追蠡漫撞廷繡戶高含霧雕楹下瞰汀
螭碑環兩廡蟠翼撲前廳廣掩桐棺薄宮嚴柏殿局雲祔猶奉祀
禋祭必羹鉶澤想流沙被功宜岣嶁銘陵園曾絞葛階上幾生蕡
越絕空遺裔巫陽不降廷梅梁空故殿空石但荒亭大地東南缺
揚波日月冥蛇龍重起陸戎馬漫生洞滔水媧難止鈞天帝不醒

瑤姬傳縹渺媛女門娉婷鳥迹交中國鯢身奮北溟支祁亂淮瀆
耕父躍清冷孰使沈菑澹深憂視聽熒請纓何道路征棹獨伶仃
古屋看垂橘他鄉感泛萍何從奠鼈極方擬射狼星息壤知難塞
狂章或震霆神姦明鑄鼎山海正圖經貳負尸仍伏防風血尚腥
元宮如命錫碧水合波渟今古堯封地生涯楚客船會同仍四海
殂落已千齡舞羽求神鑒其魚感涕零空山斜日落歸路晚烟青
蘭亭

春風吹山叢萬綠峻嶺遙連倚修竹永和舊蹟已千秋尚有危亭
傍山麓當時此地會羣賢裙屐風流朗暢天故國東南留半壁詞
人哀樂感中年樂極哀來見眞性不夸絲竹夸觴詠四十餘人同
賦詩春遊禊事斯稱盛誰爲敘者鄉琊王筆陣橫行翰墨場早解
清言諷殷謝宣將妄作喧彭殽蘭亭不灑新亭涕解組遊山墓先

誓徒留妙蹟寄人間應憾書名掩經濟男兒要在立奇功不然樂死山水中勝遊自合超金谷名作何心比石崇清流映帶茂林碧感慨興懷已陳迹但憾昭陵玉匣亡揮毫不見籠鵝客煌煌

奎藻照春風寫出高文鎮浙東想見

翠華南幸日更堪俯仰百年中

旅館夜

孤館逢春雨羈懷逐夜潮有情天黯黯不寐夜蕭蕭柝急魂同轉
燈殘夢共搖羽毛疎隱霧意氣失干霄丹穴天高遠元亭地寂寥
山泉自清濁人海任漂泊撫伏非無志河清豈可要愁予目渺渺
誰恤尾脩脩弱柳憐低首寒梅笑折腰新豐人獨醉逆旅眾何囂
大塊勞生歎華年短鬢凋式微歌未已殘滴更深宵

渡海作

大瀛際地曾環九仙島凌虛尙列三日與星辰分上下海浮天地
出東南渝溟萬里奔流廣道路連年世味諳我欲排雲挹丹溜蓬
山高處有鸞驥

舟行詰舊

遠水饒生氣寒山有靜容柳條春未到萍梗客重逢兩槳搖初月
孤帆轉萬峰登艤觸遐眺長嘯動魚龍

遠行將赴春闌

以下癸未

江海蓄春聲扁舟復遠行山雲眠斷岸水勢抱孤城客路隨征鴈
韶光負早鶯漫憐奔走力終負濟川情

燕京懷古

上谷長城重朔方姬周餘烈頌甘棠蘇秦一到開兵禍鄒衍何心
說大荒世亂多金招異士時來死馬動生王至今碣石雄風在惟

有燕昭似少康

燕

異姓封王意豈安況懲前轍有彭韓賈人計爲陳豨失功徇心先
呂雉塞里閭恩情翻覆易蠻夷侵奪復歸難早知漢主如天量應
悔匈奴暗結歡

漢

已斬苗曾定北州又驚彭寵擊朱浮誰知夜半甄長伯竟有人間
不義侯天上赤龍盤握手遼東白豕自馴頭倔強歲月終何益指
顧幽燕一夕收

後漢

東京臣節重劉公誰使神兵出地中不作帝王殊有意能行仁義
竟無功盧龍絕塞寧堪賣白馬將軍漫逞雄義士獨懷田子春欲
從避地到無終

劉虞

伏屍藏戶此城門彭祖何心負國恩死誤驅羊遮道路生由捧雉
亂中原妄思石勒來推戴早結鮮卑是禍根獨惜扶風歌慷慨抱

忠同沒有劉琨

晉

鮮卑別部此遺封典午南遷盛慕容早覬中原摧石虎晚留餘種
據和龍中興賴叩探囊智誤國堪嗟賣菜傭夾輔何人比公旦一
時造受重元恭

慕容燕

漁陽虜馬下關西一曲霓裳動鼓鼙白骨可憐逢鐵騎赤心偏使
坐金雞枉致豺虎留餘穴始信猪龍是禍梯最憾燕人祠二聖冀
方從此沒攜翠

唐

榆關險失更難收悵望燕雲十六州太息周宗促龍馭長教宋代
畫鴻溝澗淵未竟賢臣志海上徧從間諜謀莫道曹潘無遠略可
憐杯酒蓄戈矛

宋

木葉西樓建重城析津府又據南京帝祀已憾中原失虜馬何須
北塞爭宮裏焚椒窓白練軍前打草怨蒼生兩朝兄弟同歸盡可

憶遺淵舊結盟遼

大定明昌盛女貞南遷一誤故都淪千年黑水封原古五國青城
報最神舊倚宗英皆上將終尊廟盜列藩臣幽蘭一炬完顏滅猶
勝徽欽辱虜塵金

立國雄強不尙儒威行萬里擴皇圖若非異獸從天下直遣神兵
徧海隅西域至今稱撒馬北歸何意兆妖狐英風自昔眞無兩遺
裔分封滿八區元

忽徙南都向北庭燕京王氣未全停雄心自謂征沙漠失策先驚
棄大寧土木不亡臣有力潼關一破廟無靈屯兵百萬終安在未
信三邊勢建瓴明

諸蕃

椎牛騎象百蠻天蜀粵窮邊接古滇欲藉昆明遮漢使苦求蒙詔

憶唐年蒼山積寶多金穴黑水飛花冷木棉遙指朱波更南望諸
蕃今已沒風煙

閭風

閭風高處是瀛洲玉樹琅玕在上頭采色常迷三里霧神光易合
五城樓紅牆消息愁中斷碧海波濤引去舟徒向人間憶天上人
間又過白榆秋

出都四十韻

野狩麟傷股岡焚鳥失巢藏身萬人海處世一堂坳獨立心何抗
孤吟手自敲陳文傳百軸虞夢飲三爻挺節青堅柏澄懷潔藉茅
蜚英自南國發軒朝始東膠往制常榮古哇聲早絕咬搏扶豐羽翮
破敵撒弓矟闕下羣賢集廷中眾口譖靈禽千鷺鷺天馬百蒲梢
璀璨光騰寶飛礮影門簪開緘羞銜鬻撫鏡惜娥娟亦自丹黃遍

何曾黑白淆心憐敦治美目失子都姣顯晦寧天意榮名特幻泡
不平心起嶽未忍器同簪大地方龍戰諸夷恣鳥鈔杜哀狼在邑
老慨馬生郊氣吐樓飄蜃珠啼陸舞鮫盜金寧有道升木問誰教
國帑空治械軍儲困崎突何能閉西域乃敢覬南交玉帛雖相見
珠崖未可拋

廟謨專耀德天道本并包伐鬼寧愁憲平淮必闢虓白狼周入貢
朱鷺漢歌饒定遠思探虎澹臺夢斬蛟中興美江漢奇計陋居鄭
徒手嗟無斧忠肝漫代庖桑田枯失水丹路險爭峭下界憐蟻
天門仰豁塵賢須求樂毅法莫用尸佼金馬才何盛元亭客定嘲
紓青先報罷披赤且訾警奏曲儂歌懊稱名叟號聲縱含情默默
難抑志寥寥赤縣非無事蒼生本共胞材雖庸比櫟瓜豈繫同匏
鑛冀投林鵠歸思在丘嶠長安一回首落日滿鞭鞘

歸思

風塵倦京洛短髮不勝梳生計餘長鋏歸心已草廬燭涼人影淡酒罷世情疏更憶興公語尋君賦遂初

通州作

黃沙古道響駿鈴去國驂騏更此停草色似嫌霜鬢白柳條仍照客衣青鳳城回首惟塵霧人海分流若梗萍却憶故人相送處東門別淚黯離亭

寄程伯翰

別我青門外思君碧海濱臨風一回首落日更傷神斷垣常合秋花敢怨春五陵衣馬盛滾滾六街塵

相逢方笑語落羽又驚飛北闕休陳策南山去采薇故人同一慨吾道豈全非海島分明在乘風更引歸

耕釣平生願何年共入林江湖千里夢崖壑兩人心顯晦情無異

摧頽氣益沈白頭傾蓋在莫惜鬚毛侵

令弟真龍尾分飛感鵠鵠離愁燕草碧歸夢楚山青却憶申江別
方揚極浦靈無爲歎漂泊蹤跡並游萍

渡錢塘江

莽蕩錢江路漂搖楚客顏陰雲常宿壑積氣欲沈山闕下羣英集
天涯一棹還潛虬且深蟄莫惜老榛菅

夾岸

夾岸疑無路羣峯欲刺天飄流仍此日疏鑿是何年草色全含霧
禽聲半化煙家人相憶否孤泊大江邊

江村

舟移常傍岸樹古欲遮門翠氣合諸嶺綠陰成一村幽居足林壑

浪迹獨乾坤卻憶桃源事懷哉望故園

富陽

京國塵沙海上霜澄江碧又照衣裳潮聲直下雄於越山色隨人過富陽高士不來星象隱英雄一去霸圖荒遐觀每憾浮雲蔽掩映中流落日黃

過灘

浮生寄江海滿眼倦波濤岸狹舟爭地灘尊石拒篙不知天地闊祇見浪花高道路來頻數臨風惜二毛

鷓鴣冢

宋貞女張若瓊松陽人也慧美工詩詞所著有蘭雪集許字同邑沈生生應試京師病故女抱貞以殮二婢霜瓶紫

娥與所畜鷄鴣相繼俱殉因並瘞之號鷄鴣冢邑人爲立祠名貞文歲久彫剝嚴君修復其祠與墓命錫瑞爲作詩

孤鸞泣露叫山月蜀魄啼春眾芳歇白石巖通聖女祠紅心草揜貞姬骨鳳女當年謫上清璇閨玉質本天成共說雕華多逸思合

敎香茗讓才名玳瑁裝書傍珊瑚樹鍼神餘事工詞賦朱鳥窗前薄
點妝綠鸚鵡廊下敎詩句彩伴娥娥雙女奴鶯鶯燕燕日相扶三清
自合稱仙侶獨處何嘗憾小姑玉臺暝寫夸新詠夙締溫家盟玉
鏡中雀方成竇女緣求凰已見相如病青鳥從茲誤鳩媒彩鸞獨
影自徘徊挑燈織就回文字盼斷天涯鴈不來陶嬰竊竊歌黃鵠
別鶴聲聲哀怨曲何知子服集斜陽頓使妾身同晝燭春宵寂寞
試燈風夜夢淒迷感故雄鸞鶴迎歸天上去底須人世歟孤鴻能
詩兩婢多才慧幾夜霜風凋紫蕙更有雕龍解語禽都將怨魄墳
精衛雪衣殉主最堪憐青衣相繼玉埋香數尺墳不同青冢怨昭君畫樓釵
同昇共上天玉京墳燕千秋慕况復三清同委露月夜疑歸蛱蝶
魂冰霜不蝕鴛鴦墓瘞玉埋香數尺墳不同青冢怨昭君畫樓釵
鳳都成土繡閣機鶯早化塵一編蘭雪留吟譜兩字貞文重祠宇

當年秦鳳得雙飛未必芳蹤
千古陵谷遷移又幾秋秋墳鬼唱
哭鷓鴣亂鴉來弔荒墳破金鴈無光壞道愁女貞樹老清操重合
禁樵蘇培故壘舊集重刊鸞鳳文豐碑更植鸚哥冢鳳扉方復準
捉菴蕙帳松臺仙霧含爲報歸來華表鶴不須孔雀怨東南

夏日山行

山川入朱夏天地變清陰日薄疑張蓋禽幽不隔林冷青延古意
空翠澹塵心緬想北窗下涼風時動琴

綠陰

忽覺鬢眉變舟行過綠陰山光隨棹遠塔影臥江深鄧粲稱朝隱
宜僚好陸沈昔賢蜚遯意曠世少知音

由金華至松陽山行

重山若無縫去路忽中斷一轉一峰高置身已天半密勢遠近合

奇青淺深判未覺天地寬但驚耳目換蟲聲煙外多鳥影霞邊散
日光時盪摩翠氣各紛亂吾生好奇險無意愜壯觀勇進誠知艱
去累更堪惋手控流雲行頭將巨石冠聳然空谷音松鼠各奔竄
危崖擊高風落日碎有聲石壁光搖搖樹影方交橫屢折足愈上
旁窺目多驚仰攀過鳥跡俯共飛猱爭峻嶺有平步隘途無急行
舉首望重霄彷徨觀八瀛乾坤亦有極此險何時平浩浩天風吹
蕭蕭炎暑清我生匪兜虎何爲苦遄征

山天各陰晴倏忽異昏曉積陰四野暗微白片雲裏奔雷震峯巔
餘響出地表雨聲猶隔林風勢已振槁野橋光若搖鳴瀑氣逾矯
崖疏挂殘虹雲濕亂歸鳥投宿知何處煙深望愈杳下山始見人
一笠平田小

曉行

暮色壓山下行人幽徑稀蟲聲傍晚急鳥影入煙微亂石迷征路
斜陽澹客衣獨憇芳草意萬里送將歸

山行

秋高霜氣濃望遠煙嵐客路背青山人行入紅葉天寒林野淨
地險藤蘿接旅思未能忘幽懷暫云愜

曉發

棧石踏星影晨光上客衣霜濃看草瘦風定覺林稀走俗憐塵網
容身足釣磯方修混沌術永息漢陰機

夕望

蒼煙暮林端紅葉繡山阪野岸寒沙明孤村夕陽遠蹉跎感歲闌
徙倚覺天晚所思今不見誰與共仰偃

暝色

暝色帶行舟寒江吐亂洲川流日夜下獨客古今愁淡月涼山骨
歸雲宿渡頭羈心正遐曠一鴈更橫秋

遠望

遠望疑無路扁舟且獨征山形圍曲岸人影下空城落月留鷗夢
迴風續鴈聲登艤對沙石耿耿壯心明

舟中雜興

霜重蘆飛浦風高葉下灘秋光自蕭索非爲客行難
白鷺下蘆花光采同一潔入世忌孤清莫漫矜高節
野岸暮蒼煙田家背修阪黃葉一肩樵行歌獨歸遠
苦霧宿山椒重陰積未銷不知前夜雨去作浙江潮
曲岸火如星空江舟似月大地本茫茫遙天青一髮
山上畫眉鳥鳴秋亦似春不知空谷裏可有畫眉人

平生雙鬢髮半向江湖白兩岸霜華明故故欺行客

寒雨壓孤篷朔風抱帆席舟人夜相語新水添一尺

落盡芙蓉花疎疎只紅蓼却憾蘆笙飛淒迷故相繞

釣澤非釣名狂奴各有志猶憾磻谿翁與人家國事

江上月

斗柄插江城城邊一棹橫寒沙妬月影落木戰風聲旅鴈長途意
村雞獨客情頻年迫奔走臨水愧平生

舟中望富春山

富春山不斷一路繞江青短棹搖孤月寒潮湧大星鴈聲催客起
鷗夢伴人醒歸去吾廬在乾坤獨草亭

江上阻風

霜滿空林葉盡凋天迴兩岸氣蕭蕭一龍影挂雲邊樹萬馬聲添

夜半潮末俗幾人逃富貴男兒何必不漁樵阻風中酒年年事多
恐平生壯志銷

山路雨後

羊腸路九折一折一榮迴白日天擎出青山線劃開澗橫虹臥影
風急鴈流哀石壁應愁滑陰霖長碧苔

宿吳宅

荒烟歛壑日初曛倦客投林夜已分十里溪聲寒帶雨滿天山影
下如雲身同老馬空知道耳聽哀猿似失羣獨有田家甚安帖幾
時旋軫息勞筋

和元人十臺詩十首

章華臺

翩翩公子美君哉田罷雲夢更築臺坐上魯侯長蠶相宮中荆鼈

細腰來生除翠被猶知警死報冠纓亦可哀江上芙蓉花落盡荒臺不見渚宮開

姑蘇臺

楊柳荒臺久寂寥梧宮秋色莽蕭蕭肉林陋俗除三代金粉風流啟六朝斷髮竟亡虞仲國懸頭空激伍胥潮不知一舸鳴夷子南國香從何處銷

黃金臺

黃金光照海東雲擁簪賢王集大勳卅載親嘗句踐膽二城生擢潛王筋當年死骨增高價末路仙人誤霸君下士獨憐燕太子圖窮七首漫紛紜

戲馬臺

亦解王都控上游鴻門已失又鴻溝力征天下收秦鹿急返彭城

笑楚猴隻手難當三傑士餘威猶震五諸侯烏江一敗歌驍逝尙憶當年戲馬不

歌風臺

碣山雲氣尙飛揚沛國東風碧柳長遺憾白登思猛士快心赤帝返家鄉生天魄魄憐游子縮地屠沽樂上皇今日廟中空懸酒三侯寥落不成章

越王臺

不居中國居南越坐使山河屬漢家翠雀鹽忘兩帝立班駕曾向陸郎夸生前黃屋尊秦吏死後蒼梧敗呂嘉一自伏波開七郡更憐鬼火照蠻花

柏梁臺

柏梁高宴獨稱尊武帝旌旗眼底存日月僞詩高萬古火灾厭勝

壯干門樓居倘有仙人迹葉落難招彼美魂解讀西京惟趙鬼越巫乃復誤東胥

望思臺

竟天妖燄見蚩尤四十年來戰血流鬼哭陰山驅虜馬神來高廟弔泉鳩宮中堯母沈冤魄獄底曾孫伍死囚多殺楚靈終及此誰憐車下一身投

銅爵臺

淚滴金仙尙未銷臺成銅爵早宕巍幸非豚犬夸諸子已失驚鴻望二喬赤雀詎來西伯國黃龍偏見故鄉誰總帷歌吹人安在只有輕花片瓦飄

凌歛臺

寄奴不死真王者虎步龍行氣自豪北府膽寒靈寶舸西行威震

赫連刀雄爭魏操文微愧志比桓溫功更高何必三千宿歌舞一臺田里足償勞

江行絕句

燕子磯頭望長江流拾漁可憐金陵城燕子竟飛入
伐荻丹徒洲寄奴真王者何不清中原彭城空繫馬
一白明篷窗波光映殘月不知平旦霜疑是宵來雪
可憐石頭城黃葉西風滿寄語江上人挂帆須緩緩

冬日暖烏篷晴光滿水國獨憾南風多有人行不得
水月晚爭明羈人欲愁思夜半聞鐘聲知是南朝寺

野館見早梅

野館寒梅發幾枝垂垂一樹正芳時美人自惜春光暮遠客應傷
歸計遲流水空山誰見賞冷風疏雨漫相欺征途未忍加攀折坐

對幽香有所思

題古松圖

老龍夜捲蒼山石雷雨下走太空碧微茫古色入毫端落落乾坤見松格想當下筆煙雲馳尺幅萬里藏蛟螭畢宏韋偃去已遠奇氣鬱勃千秋姿愛君松圖爲君賦安得結廬傍松住

師伏堂詩草卷四

善化皮錫瑞鹿門

春日野望

以下甲申

嵯峨古壁帶蒼苔獨倚東風眺八垓
幽鳥喚春催物變亂鴉銜日
下山來曾聞草澤多奇士誰惜江湖老
異才十載鳴琴向於越長歌空撫獨絃哀

晚晴

大地荒寒趁晚晴幽崖樹影正縱橫
長風捲水沫無際積雪浮天
暗有聲自向空山銷歲月誰抽長矢射
櫑槍遠游王粲多春感況
聽清猿向夜鳴

空谷

空谷無方可息關容身似欲隘人寰
泉聲帶雨都歸澗春色和煙

欲上山有志尙思清渤海無才何恨老榛菅白雲千里遙相待
叢桂幽崖定可攀

晚過陶村

日暮鄉村共掩關勞勞征駕未能間月隨倦客行深谷雲帶歸鶴
宿亂山積雪寒光上襟袖荒原人語雜夷蠻抗塵走俗年年事慚
愧清流照客顏

歸夢

芳序變青草曉煙橫翠蘿歲華流水去歸夢亂山多人世雙蓬鬢
浮家一釣蓑故園桃李樹春色幾蹉跎

偶感

樹老春增色溪寒雨助聲感時芳序改望遠壯心驚拓土懷王道
談天笑大瀛誰將強弩射西海有長鯨

春草

東風綠遍湘江草獨憾他鄉草色濃客路韶光負鶯燕大江春水
變魚龍田園久愧陶元亮仕宦吾師邴曼容世事茫茫難豫料何
妨老作故山農

宿嶺上田家

細雨人煙暖遠村春來作客倍銷魂遙天似夢疑無路澗水如雲
直到門抱策無端走江海轉蓬何日遍乾坤瓦燈茆屋山家宿伴
係羈懷孰與論

客鬢

客鬢不常綠天涯草又青喚愁偏日日攬鏡益星星別思長隄柳
行蹤大海萍驚風與逝水朝夕幾曾停

雨後

雨餘山日薄風定野煙高絕壁攀雲險懸崖構屋牢栖皇非得已
行役敢辭勞中酒江湖客年年感一二毛

泊杭州城下

碧草平沙媚遠汀扁舟極浦獨揚靈山浮塔影橫天白海鹽潮頭
落地青乳鳳至今懷故國大鵬何路奮南溟曉來霜色應全減猶
憾春風兩鬢星

有感四首

明都宅地本堯封象郡秦關定幾重曾爲聖人供白雉那聞夷犯
罰黃龍江邊鬼火宵含毒天上神兵晝舉烽萬里朱垠尊漢德重
樓莫使舞梯衝

觸蠻兩敗血猶丹不戒句東更逞殘封豕竟思侵上國佛狸肯使
享桑乾佳兵覆轍前車在殺氣漫天大海寒好亂何如修舊約西

方物力亦應殖

漢援南越本雄圖
郡國何嫌下虎符
海上大鼈身可釣
日南珠蚌淚應枯
鳶飛豈得容徵側
鵠倚當思救勃蘇
獨奮空拳支大敵
可憐莊蹻一軍孤

舊掃黃巾定建康
桓桓上將鬢如霜
已收銅馬推心腹
共保朱鳶拒虎狼
失計中山臍可噬
異時於越膽應嘗
欲呵畫壁將天問
爭遣烽煙遍大荒

客行

客行愁雨雪捲幔喜新晴
夜月沈鷗色春風變
鳥聲摧輶驚世事
攬轡惜平生敢作懷安想
孤帆更遠征

春日江行

富陽至桐廬奇景一百里
世無吳叔庠誰與識斯美

白石帶清流彷彿湘江上芷蘭風露多遙望還惆悵
嶺上寒梅發攀條念故人思將一枝寄不是故園春

戍鼓響江頭聲聲夜不止長懷杜老詩怊悵書生耳
素腕鳴箏女朝朝自鬻歌妾生在江上不復畏風波

隔江有茅屋蓬戶向江開鷗鷺如相識隨波日日來

白雲起前山遙遙似相待獨憾在山泉何時流到海
萬里孤蓬客長江獨夜人江花與江草爛漫爲誰春

客路春感

春滿閒林雪盡銷蠶陽時節客程遙柳陰夾岸都迷路花影扶人
欲過橋綺里無心仍佐漢箕山何意獨逃堯芳華不入羈人目始
憾江湖短褐漂

道中柳

星飯先鴉起宵行後鳥歸關山春易老江海願多違幽草妒青鬢
浮雲幻白衣隄邊新柳色相送獨依依

落日

落日萬山心歸雲不可尋征人未投宿眾鳥各棲林樹老遲春色
峯高淡夕陰煙中有蕭寺忽復暮鐘沈

還署見桃花

別爾經三載方春見一枝美人憐晚暮獨立愛芳時帶雨紅侵幌
臨風影入池含情似相待破萼故遲遲

松邑寓齋作

作客怕逢春他鄉客候新簾開蜂入坐窗靜鳥窺人走俗非羈宦
揚波異隱淪蹉跎時又過空復憶松筠

葉公希賢祠

公松陽人其裔孫云公從亡客死於外無墳墓兄徵從亡錄可信

寶位親藩纂金川帝德慚龍飛曾未久虎視已先耽漢禍生猜忌
周官誤坐談檻羊跳薊北風鶴動淮南鑰啟師偏漏城危亂莫戡
幼君宮火避烈士鼎烹甘異兆誠膝舊先機度牒諳緇衣繩祖武
黃面拜瞿曇賢者名宜應新朝貴不貪鬼門行子子神語報誦謗
蒲翟五蛇輔襄城七聖驂蓬漂自滇蜀杯渡屢江潭業未中興奏
功徒內典參茆檐邊地翦藜杖佛經擔足繭千山雪心驚萬嶺嵐
茶毗嗟早化憂國本如惔餘冊名畱鼠從亡錄食蟬沙釐真義士
宏演是奇男故土荒祠在深山宿霧含疏櫺風烈烈虛牖柳毵毵
後裔仍松邑遺文記雪菴幽光甯可掩行腳果誰堪斷髮誠無二
丹心篤在三羣鳥來早晚猶似拜遺龕

暮行

蘿條落日萬峯陰遙指歸雲獨鳥沈已憾元亭空尚白何知墨突

未能黔百城南面甯非福十載長途愧此心早使聲名脫韁鎖肯
焚斐製出山林

驛夜

海上張旗尙未休江湖浪迹復何求長途不異僧行腳小住何妨
屋打頭願伏瓜廬尋大隱空紉蘭佩託離憂乾坤浩蕩猶嫌隘楚
客偏思賦遠游

春感

去年春色滿都城燕市行歌意氣橫有客來騎西極馬相攜同聽
上林鶯風光綠野周于畝道路繙塵漢二京今日清漳淹臥久隔
牆愁聽賣花聲

漢廷

漢廷高議尙紛紛海上烽煙日夜聞徼外已收邛筍長津門猶駐

羽林軍蒼生莫定安危局白面羞談翰墨勲豈有鉛刀能一割謀
臣如雨將如雲

山行

天壓四山青山光入杳冥安知大荒野亦列錦圍屏古壁朝屯霧
塞崖夜倚星何當結茅住高臥誦丹經

孤館夜

霧斂峰頻吐橋危水暗吞泉聲夜驅石山翠曉迎門我欲棲巖壑
因之長子孫斯懷未能遂悵望獨黃昏

寒食

昔人馬上逢寒食今日途中值禁煙客裏春光隨路遠雨餘山影
傍雲眠每當佳節愁三月不拜先塋近十年愧爾墦間春祭者柳
枝齊插向墳前

金華道中

氣喧桃露廝風急柳弓腰春雨洗山色夜泉吞石橋無家似跳弋
有志託鷦鷯安得求羊侶深林共荷樵

清明日至金華

清明本是思家日況值清明更別家作客春光太飄蕩向人山色
自橫斜禁煙故事傳榆火芳信連番到杏花今日幸無龍忌在石
泉初試雨前茶

杜鵑花

杜鵑血洒荒山草化作幽花血染紅皇帝歸魂自西蜀騷人寫憾
向東風半開忍見三春暮數點平分萬綠叢爲報哀禽莫頻喚天
涯歸計太匆匆

蝴蝶

紛紛紅雨惜芳菲柳絮隨風暗入幃蝴蝶不知春去盡晚來還繞
菜花飛

菜花

野圃春深菜甲肥也同桃李鬥芳菲一吟張翰黃花句何必秋風
始憶歸

王文成公祠

聞公五世孫某
全家殉節無後

浙水生人傑龍山毓地靈千秋瞻廟貌一代煥丹青賢聖徵先覺
科名奮綺齡文雄光玉簡道妙闡金庭未見功橫草先驚杖拜廷
分甘窮髮竄幸脫錦衣刑境困神逾徹居荒德自馨良知談厯厯
獨悟警惺惺起用來江右兵威震贛汀浰頭烽息談大鬚血流腥
鎮國名尊壽雄藩亂起甯孤軍親躍馬一戰速澆螢宦豎清功罪
讒夫混渭涇侯封人更嫉主易聽尤獎晚迫思恩議軍還絕徼停

斷藤方奏捷五丈遠沈星自昔儒爲戲誰能眾獨醒但矜門戶闢
幾見鼎鐘銘著論追鄒嶧開宗異考亭胸中具兵甲心學闡畦町
自可崇雙廉何須注六經虛聲言早雪神用妙無形曠世難登席
撞鐘莫用莛荒祠畱故士古屋閉疏櫺曉月寒生寢春風薄掩屏
衣冠仍勝國苔草滿前廳世澤閭中斬天心太晦冥抱忠翻殄絕
遺像未凋零山樹猶環翠溪毛孰薦萍載瞻三不朽百世仰儀型
湖上小飲

檻外風帆起暮煙春深魚戲近窗前相逢小飲當三月不到西湖
已二年衫影碧添春水色酒痕紅入夕陽天夜游卻憾嚴城隔欲
宿澄波更惘然

歸鴉

栖鴉將暝色歸去各紛紛古樹光偷月方塘影渡雲未能逃世網

何術離人羣獨憶元亭畔殘書冷舊芸

得伯翰都中書懷欽於正月初八日病歿以詩哭之

忽有都中耗驚君地下游年催薤上露病劇茂陵秋萬卷空黃土
一棺猶黑頭春風回首望雲黯仲宣樓

一別遽千古重逢斷此生燕勞方楚越人鬼倏幽明尚有三秋約
空傷萬里情廿年師友誼遙夜夢魂驚

憶昔清漳臥幾歸桑戶真勞君頻問疾勸我善和神豈料虧軀在
翻悲宿草陳故人同一哭非子孰沾巾

幾度傷生別吞聲獨死悲空勞素車往豈復一樽持以我行山日
當君易賣時猶懷袖中札莫寄隴頭枝

詩正題人日君先近鬼門悲風吹雨雪浩氣返乾坤不盡黃墟感
難招黑塞魂天顏與壽跖天道復何論

一第嗟何晚千秋惜此才淚先枯楚璞骨不貴燕臺天上應差樂
人間大可哀玉樓歸赴召莫更下塵埃

壯略經綸負遺文輿地編勞心演微志蒿目越南天遂有姜戎戰
誰先祖逖鞭倘聞烽火急泉下更淒然

志大遭天忌才高與世疏非時枉麟鳳失計託蟲魚已作藏山想
難成仰屋書毋憂覆醬瓿光氣豈終虛

感憤四首

赫怒傳

明詔安危在大臣星闕餘涕淚日下煥絲綸票騎宜無敵長蛇詎
可鄰旌旗今一變

廟算本如神

捷報無消息傳聞有是非潛蛟蒸陰火闕虎赫天威戰血蠻花灑

妖雲乞鳥飛何人奮雄略努力破重圍

介胄當言戰儒冠亦恥和射狼猶有矢麾日豈無戈大將鼓旗出
諸軍劍佩摩漢家朱鸞曲早晚奏饒歌

豈有狐駘誦方聞馬謾誅令嚴先大帥籌運是中樞瞻仰千秋事
艱危七尺軀男兒當裏革莫憚許馳驅

杭州歸舟

夢魂猶駭浙江潮川路時停楚客橈春帶落花今又去愁如蔓草
不能銷短篷載月常依岸雙槳搖星欲過橋幾日菰蒲看漸長卻
嫌舟過更蕭蕭

江上晚泊

燈光隨岸遠斗柄插江寒日落煙屯渚舟移水下灘故園叢柳杏
春意滿闌千久客不歸去空歌行路難

古廟

荒原古廟枕江干一角紅牆夕照殘龍護瑤窗應帶濕鴟依寶座
不禁寒鐘聲夜月沈煙寺幢影春風暗石壇欲覓野僧談象教蕭
蕭暮色下前灘

漁燈

漁燈紅渡水夜色白橫天初月明還隱歸雲斷復連山陽深慘笛
溢浦倦聞絃鄰舫歌聲發星河落滿船

山行見梨花

獨將冷豔向春風掩映空山夕照中記得故園寒食後滿天香雪
撲簾櫳

聞鶯偶感

山路鶯聲四月天遠天如夢柳如煙平生厭作荒陬客不道投荒

近十年

桐花

芳菲落盡尚天涯碧峭摩天挂晚霞一片斜陽人不見暖風開遍
刺桐花

早行歸宣平

到處客身足釣磯灌園終息漢陰機晨光泱漭明山谷草色微茫
上客衣花事幾番呼負負柳條相對故依依征夫前路何須問衡
宇遙瞻未是歸

客夜

薄暮仍孤往窮途更獨吟雞聲仇斷夢蟲語警秋心物變人如舊
年催髮易侵晚來山更寂樵唱歇前林
去口

去日茫茫不可尋前途更指萬峯陰禽音百轉出深翠漁唱一聲
生遠林霜雪恐添他日鬢風塵忍負故園心江山信美非吾土根
觸羈愁總不禁

金華登舟

前路復何往扁舟任折旋江流繞岸曲山勢壓城偏鶴影常衡日
禽聲半隔煙豈無江海志奔走愧長年

畏人

虹收江面闊夜靜浦帆孤遠火時明滅遙山半有無畏人憐客子
避世獨耕夫愧爾滄浪意糟鷗尚可餌

江邊星月

月白人歸浦沙明鷺宿灘魚龍當夜靜星斗壓江寒素志殊堪表
扁舟任所安南思偃溟渤長此狎波瀾

江行眺遠

詩草卷四

苦霧沈江未埽開登艤眺遠興悠哉風帆似鳥浮山出雲影如龍
渡水來玩世獨憐莊子意憂時誰識賈生才越吟楚奏俱難遣莫
向江頭賦七哀

芳歲

芳歲忙於客長途滿綠蕪初心負崖壑歸夢墮江湖岸遠山遙瘦
星沈月更孤林間見棲鳥日暮獨相呼

遠征

波路貧辛更遠征畫橋時見碧陰橫冷青團樹若無縫空翠滴蓬
如有聲愁向戌樓聞斷角誰能滄海射長鯨崆峒一劍隨身在落
日蒼茫獨此情

旅夜述感

滄滄川氣白蘋蘋夕照紅水明天見斗雨過岸沈虹賈客攜觴酌
舟人理釣筒一星枯蚌火雙槳夜漁風生計餘長鋏天涯託短篷
往來行僕僕日月去匆匆倏見花飛柳旋看蔭密桐歲華催鵝鳥
秋意動鳴蛩掩抑千秋志昂藏七尺躬心隨帆上下迹逐水西東
寶劍吟元振鎗刀慨太沖邊城方燧舉身世復途窮倦鳥尋枝宿
驚猿怨桂叢蒼穹若可問未必竟夢夢

戲題嚴先生祠壁

千載高風有舊祠一灣流水照鬚眉紛紛題詠爭夸賞恐是求多
買菜詞

曲岸

曲岸羣山合荒江一棹橫川長畱鳥影風急遞蟬聲南海烽常警
西戎禍未平書生幕張傅何路請長纓

江上晴

天地一浮漚飄飄江海頭虹腰隨雨斷螢影帶星流無限瀟湘意
常懷杜若洲何知誅山木仍在越人舟

重過嚴州

歲月曾無幾江山似已非來愁波浪闊去苦石沙飛岸遠牛羊小
川長鷗鷺稀前灘聞更險先怯眺危磯

晚望

遠岸雞聲夜叫煙登艤起舞向江天有情明月來窺客無數青山
亂入船海上釣鼈餘壯志途中泛鵠撫流年狼星欲射無長矢悵
望西南殺氣纏

蟬

本自耽高潔何須費苦吟無矜翳葉密最好入山深恍慨羈人意

悲歌壯士心抱枝猶憇叩寂莫求音

閩洋馬尾戰事

東治分疆更向東無諸舊壤是閩中解圍曲逆無奇計下策阿奴
有火攻藏壑徒舟憑大力造船名縣誤司空可憐青雀黃龍舶化
作烏林一炬紅

重九日普照寺登高呈同游諸人

倚嘯青山首獨搔來游蕭寺且登高每逢佳節懷鄉國況對西風
撫鬢毛白鴈元猿同感慨長鯨巨鰐自波濤不堪東望滄溟闊秋
色蒼涼上佩刀

感事四首

埋輪風節重東京北伐深源負盛名痛哭固宜求屬國少年何計
請長纓徒夸十萬橫磨劍已失三千被練兵奮翼溷池應有待大

功早晚出儒生

據鑿願盼定乾坤欲挽銀河答

主恩北宋尙畱種少保西羌獨畏趙翁孫白頭報

國功名老碧眼窺天日月昏此去定能銷玉弩待聞朱鷺肅雲門
一錯眞難鑄九州中山故國是流虬西行鶴立無援救東略鯨吞
有狡謀棄屬豈忘莊助詰積薪早切賈生憂十年垂拱邊烽息辛
苦諸公爲運籌

赤縣窮遼控海濱迢遙鹿耳接鯢身虬鬚敢覬夫餘國烏滌猶存
裸壤民爭戰一枰軍勝負縱橫孤島氣嶙峋桓桓萬里長城在應
信神州定有神

三國志小樂府

郿塢積千金爪牙有呂布欲作富家翁董逃向何處

奉先泉雄姿反覆苦無定奈何階下囚徒言人臣信

燕南與趙北中可著斯人無奈袁兵至攻城若鬼神

景升坐談客生兒豚大耳無才工詆訶季緒真肖子

千金贖文姬阿瞞亦慷慨如何殺孔融不復全交態

哀哉荀令君飲藥濡須口不學華龍頭破壁牽伏后

馬兒若不死曹瞞無葬地幸哉漳水濱猶留疑冢瘞

雞肋復雞肋曹公棄漢中那知青頭雞優人唱深宮

割席交已絕避賢猶自夸蹤彼盜跖財乃欲汙良家

奏樂望西陵伎人好顏色安知用舊人狗鼠乃不食

天命已在孤篡謀何必迫不學陳將軍坐談效西伯

駕馬戀棧豆不及馬同槽持彈東南行唱者何囂囂

鶴鵠復鶴鵠禡父嗟喪勞更憐南闕下高貴鄉公髦

斬充謝天下壯哉陳元伯誰云公慚卿太邱有遺澤
諸葛三千士同死嗟無成頭顱夸五百猶覺勝田橫

三國兩臥龍孤忠無二心惜哉廣陵散不及梁父吟

丞相寫申韓奉命由先帝如何船山翁史論有遺議

寶帳寂無言霸氣西南止天將大討曹阿公老不死

樂此不思蜀斯人太無情誰知不再傳蝦蟆天子生

三國皆姻戚何止孫夫人不見夏侯墻乃有張將軍

詠懷以下成子

至人不徇物入世誠獨難已落塵網中安得暢遐觀俚音駭白雪
凡骨輕金丹服艾戶盈腰誰解紉秋蘭知希道所貴俗忤生易殲
乃悟洗耳人高舉求所安金馬可避世大隱敢輕言

噭噭隨陽鴈嗚聲環客舟方喧倏北返避寒復南游豈知周身防

銜蘆尚未周智殫每墮險計盡斯叢憂不見晁大夫亡身東市囚
何當逃空虛高舉凌滄洲

一夕復一夕一朝復一朝人非金石軀豈得長堅牢田光誠烈士
末路精已銷好壯臣乃老白首苦不招舉目望山河山河日蕭寥
滔滔大江波滾滾東海潮安得挽羲轡上折若木條

瓊樓一何高明月照其牖上有傾城女當窗垂素手禮姿奪天桃
纖腰爭弱柳見者疑神仙明豔世無偶朝華不長妍倏忽成老醜
盛年豈不懷感帨恥奔誘世無梁伯鸞誰與奉箕帚玉貌良自珍
冰懷願終守

南華論物化蝴蝶爲莊周神馬與尻輪變幻無可求天地同一指
古今若浮漚立說如荒唐測理非謬悠胡爲苦家貧貸粟監河侯
遂使冥鯢大幾與轍鮒侔乃知高世士未免飢寒憂陳義非不超

治生亦須謀枯槁倘終索逍遙亦難游試問升斗水何如坳堂舟
黃華秀幽谷佳色何離離涼秋白露下曠曠發奇姿世俗不解賞
高人掇其枝裏露可延年餐英足療飢晚節豈不貴已後春華時
豔陽有桃李爛漫攬予思

胡馬常依風死狐必首邱奈何遠行客棄家事遨遊魂夢時搖搖
腸輪日九周江海多風波荆棘森以稠故園桃李花葳蕤爲誰留
別後已經年念之生百憂噭噭林中鳥歸來得自由我今何爲者
南望湘水愁

平沙多莽莽千里盡蓬蒿蒙翳不見人悲風夜蕭蕭蕙華媚幽谷
亭亭亦若若美人不我采棄置隨枯茅昔人疲鞅載發憤著解嘲
豈知山林客空負聖明朝

渾沌未可鑿鑿之元氣死荒荒太古意乃在深山裏吾觀田舍翁

老不入城市抱甕永息機荷蕡無嫌鄙完樸少雕琢含和如赤子
何必巢居人方悟清淨理

湘陰阻風以下己丑

漢將英靈定有無伏波祠畔響菰蒲輕舟不比行軍緩留滯何緣
類賈胡

絲絲微雨點輕波葉葉征帆下汨羅夢醒推篷看春色艣聲還比

鴈聲多

汨羅弔屈大夫

蘭芷千秋在沅湘萬里春重來羅子國一弔屈靈均怨水投江石
荒祠薦渚蘋鱠鯨猶受制龜策詎能神

問天終不語割地竟如何遺憾抽長矢離憂託短歌蕭條武關路
恍惚曾陽戈日暮思公子君門虎豹多

詩草卷四

三

岳陽樓用杜韻

莽莽乾坤在浩然登此樓地分雲夢闊天與漢江浮
悵望湘靈意聯翩楚客舟可憐樓下水日夜向南流

赤壁

赤壁凌江迴鳥林隔岸回孫曹餘霸氣荆楚自奇才落日衡山沒
寒星渡水來登艤獨憑眺橫槊亦雄哉

諫草堂

太虛還浩氣故宅有松筠諫草悲前事梨花泣暮春千秋同灑淚
一疏獨批鱗想見揮毫日忠肝動鬼神

椒山自有膽天子太無愁碧血埋忠日青詞誤國秋飲章沈北寺
齋醺進東樓西市非君意何緣伏劍休

七夕雨

秋來銀浦有流雲
雲水蒼茫色不分
莫向星娥問消息
碧天如夢雨紛紛

仙橋欲渡畏風波
烏鵲空填一夜河
寄語靈禽休自怨
雙星淚雨本來多

誰汎仙源問碧天
孫清怨自年年如
何千載璇宮織不滿
當時三萬錢

和程海年同年

頌芳游仙詩八首

會見洪崖早拍肩
浪游山澤作癯仙
青城一別滄桑變
小謫紅塵四十年

琳宇桃花幾度春
瀛洲玉屑散如塵
劉安不是無仙骨
悔向天階說真人

離台神光定有無
絲旄左倚盡仙姝
如何上界通仙籍
不及空言

項曼都

傳召驪鶯上紫氣銀河滌筆撰鴻文興酣潑墨淋漓甚灑作人間五色雲

金銀宮闕水波環侍宴靈妃盡玉顏聞道神仙多富貴果然天上勝人間

嚼罷紅雲嚙彩霞鳳車游徧列仙家阿誰解贈金條脫祇有仙人募綠華

瑤環福地上清居快讀生平未見書王母早傳青雀到玉盤盛露賜相如

綠章夜奏達通明乞取春光滿玉京十二花神齊上殿萬香如海錦如城

中秋書感次海年韻

鳳城楊柳又驚秋楚客登臨始欲愁索米長安萬人海側身天地
一浮瀛三千枉抱東方牘十上難完季子裘同是天涯感淪落暗
中誰惜夜光投

世事浮雲幻白衣薦門秋老未能歸金椎馳道青松冷玉殿高空
黃葉飛對泣楚囚心尙壯再投荆璞願仍違龍蛇處世存吾道那
共侏儒間飽儂

哲兄一慟人琴杳回首神交最可傷著述每思同閉戶說詩猶記
夜聯牀絶絃我已孤同調灼艾君應感斷腸死別吞聲懷李白屋
梁月落澹煙黃

雄劍霜寒夜有聲陰符讀罷夢南征滄溟劫火連烽燧微寒秋風
急鼓鉦望闕悲風羈客憾籌邊封事老臣情紅牆碧漢無消息孰
挽明河洗甲兵

無題

王母靈禽尙未回，車聲日夜走。
輕雷欲採消息防，鸚母生恐年華誤。
鳩媒駐景有方仍寂寥，留春非計且徘徊。
相思未必全無益，不那心情一寸灰。

送汪壽民

詒撰南歸

一別動經歲，相依復半年。
春深燕市酒，秋老薦門天。
競爽難兄在，論交獨子賢。
明燈孤館夕，相對意茫然。

送劉振愚

鐸

往山西隰州

古木畱霜氣，高齋納鴈聲。
那堪搖落後，重以別離情。
哀樂關中歲，羈孤仗友生。
昔人悲九辨，送遠獨魂驚。

此去重關險，迤西出井陘。
成安自迂闊，漢將有神靈。
虎嘯長林黑，雕盤大漠青。
君行應弔古，佳句滿旗亭。

旅夜偶懷

夜冷秋歸樹風高露洗天啼蛄弔明月寒蟬語流年雜感常驚夕
新愁每墮煙淒涼懷舊意樽酒六年前

重九日偕黃麗泉

廣

鄭寄凡

業綸

湯稚菴

魯璠

陳景章

翰青

黃子

餘履初

林綬臣

系尊

汪頌年

詒書

遊天甯寺感所見有作呈同

游諸君

塔鈴不語霜鐘翳寒蟲弔秋響山寺古松化龍倦不飛土花苔斑
斷佛臂黃塵漲天車馬來白日墮地山門開呼朋促駕入古刹快
遣羈緒臨高臺醉看茱萸念鄉遠故園叢菊開應滿北地天寒花
較遲祇餘幽桂媚秋晚坐中有客生酒悲尋春惆悵嗟芳時章臺
柳枝爲誰折珊瑚微步來何遲幾年故心人不見畫圖猶識春風
面驚鴻照影似當年彈指流光若奔電酌酒勸君君勿愁異鄉爲

客當清秋酩酊佳節且共樂人生聚散如浮漚君不見此塔隋朝
修佛供六代繁華渺如夢金粉奄忽成空花桃源何處尋仙洞客
喜酒罷驅車歸浮圖插天挂晚暉霜林半醉馬蹄澀萬里秋風生
客衣

天甯寺古塔歌

浮圖倒影摩青天勢如涌出層霄巔憾非虛中少階級登高欲上
茫無緣我來弔古心悽然四角半露金鈴懸手摩殘碑訪故迹冊
建實始開皇年開皇遺事史所記普六茹氏方乘權外家竊國類
新葬豈有功德祚久延不能祈天乃佞佛高標跨極凌幽燕當時
何處得巨費得非賣兒貼婦錢欲求象教永國命楊家二世皇輿
遷迷樓百尺高千椽應比此塔尤高堅雷塘運去佛不救有好頭
頸誰相憐六朝南北崇金仙未聞火宅開青蓮洛陽伽藍侈足戒

臺城餓死心徒虔乃知梵王未足奉保國豈在窮雕鐫不如且談
米汁禪酒醉自枕松花眠隋朝興廢置勿道落日挂塔橫蒼煙

感事五首和瞿子玖學士

鴻烈

典祀郊宮肅輝光帳殿開如何宣榭火更甚雉門災黼繡驚燔燎
軒朱付劫灰蒼茫天意在爲問董生才

中興堯舜力陸海帝王州豈謂勞宵旰無心樂宴游扶宮承鳳輦
問寢拜龍樓西望瑤池地澄波太液秋

九州方聚鐵三輔旱糜金軌轍分夷夏山川自古今鑿傷應地脈
變異豈天心莽莽中原土凋殘恐不禁

嗣服逢新政匡時仗老成中年感絲竹大計託棋枰綠野優游意
蒼生仰望情安危繫公等早晚答升平

九關無虎豹大澤有龍蛇不少憂天計其如仰屋嗟幾時陳白簡

鎮日草黃麻每惜蘭荃變羣芳莫漫誇

送汪頌年往山東省覲

人生聚散那可測蓬轉隨風異鄉國先時我亦欲東游君今東行
我滯畱畱滯京華復何益萬里秋風雙鬢白如君令弟學苦勤北
來空枉金門策君才槃槃不可攀尺木騰翥須臾間舍人雖卑秩
清要戲綵亦足娛親顏涼秋九月津門道齊東省覲行宜早風沙
漠漠隨征車霜葉離離墮秋草誰華山色青徂來大明湖光照酒
杯賢兄厯下喜相見對牀風雨傾金罍我聞聖學分齊魯濟南書
義埋千古欲往山東尋大師遺經獨抱竟何補君行弔古應徘徊
文筆倒捲滄瀛回春風催人芳草綠駿馬更踏黃金臺相逢一笑
心顏開

送鄭寄凡往山西大同府幕並寄陳伯平太守

燕臺人去秋草荒楚客叫天天蒼茫明河水乾玉梯絕虎豹守關
高九閨窮途四顧天地窄詩人落魄長安陌霜華點點旅鬢斑風
沙冥冥俗眼白寄凡先生靜者流狂歌意氣橫九州興酣覓得錦
囊句拍手大笑忘窮愁博浪一誤副車中金門上書謀不用早有
才名接鵝鴟那堪伏竄傷鸞鳳薊門秋老登高臺青衫共醉黃花
杯日下窮交且爲樂雲中幕府忽需才別君勸君休失意好將詩
卷留天地無事且爲汗漫游大才當得山川氣居庸峩峩高插天
平沙萬里無人煙土木從來戎馬地長城還記祖龍年六年不見
雲中守憑君寄語相思否絳帳師嚴道自尊黑貂裘敝憾何有立
馬高吟出塞行男兒遠志事長征隴頭定有新詩寄聽爾金戈鐵
馬聲

題圓圓小影

妖雲爇天香委露古紅斑斑泣絹素麟閣圖勳自一時甘泉不畫
傾城姿麻姑歸來變滄海江山舞罷腰支在血凝血散幾乾坤未
信玉顏常不改漢宮倭墮鴉黃塗鏡光曉換摩尼珠空花幻化延
壽筆真本誰識王嬌圖笑巢老梟死岣嶁翩鴻冥冥迷處所宮中
花草散如煙一朵蓮花開淨土羿弓彈日姮娥奔蟾蜍化身悲古
魂金城鐵鑄有壞缺寶相圓圓長似月慧珠朗照梧宮秋秋眸忍
看臺鹿遊神光離合春風面攢蛾愁向圖中見

冷紅軒集題詞

集爲成子蕃之姑長白友蘭女史著女史少苦節子官浙江藩司杭城破懷印入井以殉

胥濤撼天天帝醉碧瑩銀牀凍鵲淚衰紅茫茫忽化煙于年憾血
苔花斑女希力盡坤軸折蘆灰不填海池缺半世飲冰冰不寒夙
心止水無波瀾金印沈沈比懷石瞿衣五色蛟龍惜其姬陵母兼
一身寒泉滿劙回古春紅羊刦換池灰黑一卷冰雪消不得義心

苦調金玉聲精衛夜嘯孤鸞鳴冷光熊熊團竹素臣姑不數齊紈
句

題紅線取盒圖

鳳釵蠻髻青絲履洛妃乘霧走千里鄴臺不見銅雀妓照人肝膽
漳河水驚鴻喝月飛翩翩雌霓光射文犀塞田家豎子猪龍孽纖
腕肯汙老蛟血披帷取盒超旗門妖星掩芒神斗昏曉角吟風一
葉墮九關不啟歲華鎖肉飛仙還快馬馳一紙書卻千熊羆上黨
寶城如鐵鑄碧天高高無覓處

得家書

久客多深慮平安得尺書家門幸無恙鄉國事何如關塞一鴻鴈
江湖雙鯉魚何言萬金抵魂夢乍舒初
捧檄何時遂高堂自倚闌望雲心未已愛日意猶虛藥餌常愁誤

沈嬰尙冀除無能化黃鵠歸奉舊園廬

鴈門太守行

陣雲帖地旌旗紅殺氣上天成白虹飛檄憑關走風雨早聞陰燐
黑夜語戟鬚毛卷僵臂裂馬蹄碎冰襍人血冷凝角咽風蕭蕭刁
斗沸聲如海潮漫空塞沙削人面龍蛇紛拏不相見歸來自數刀
箭瘢長劍倚嘯崆峒山

長平箭頭歌

沙黃月黑陰雲昏四十萬眾悲古魂野人耕煙鋤碎玉古色斑斑
繡深綠鶉首賜秦上帝醉封豕突窳磨牙噬蜚廉遺孽兩趙氏血
凝血散知誰是髑髏如山化作煙金痍色染苔花殷馬服突圍萬
弩殺流丹得非此箭括塞鴈避影林猿哀銳頭小豎安在哉邯鄲
事往如春夢鬼語猶聞夜深痛

書昌谷集後

奉禮卑官憾未除才人合在玉樓居如何李相求遺集不及當時
薦子虛

大風行十一月初三日紀異

是日考御史

瑤殿櫛櫛頽雲昏蜚廉怒號天九門沙石撼柱柱欲折上清宮中
凍臂裂濁鳥影蟄癡龍眠青蘋噫氣黃塵天珍珠密字如蠶小金
臺翩翩百鷺鳥天公大笑千年觥玉女投壺無苦聲仙人鞭鳳鍛
鸞翮更裁青梧植翠柏

四十初度書懷四十韻用老杜夔府書懷韻

昔奉貽經訓常懷曩哲師賓充觀國早計悔出山遲綺歲蜚聲候
青雲抗志時鴻名嘗忝竊鵠薦荷深慈自脫諸生籍長歌行役詩
鐫剗才盡矣馳騁意何其少壯真難再文章敢自欺鬢從湖海白

衣染洛京緇身誤儒冠枉胸懷古義私龍蛇吾道在鸞鶴壯心衰
碣館徵賢日金門抱策期羣持鍊都筆競解說詩頤獨以相如病
翻成宋玉悲三山高碧落萬里隔形墀慷慨波濤狎狂歌寇盜遺
雙輪溟渤艦各國滬江旗省父清懷絳亡妻困據黎子安畱短引
潘岳費哀詞事往風雲失謀疏翰墨疑趨庭比東郡隨侍潤南夷
記室兼籌筆銜齋雜土茨荒蕪吳祐簡寂寞董生帷僻處憂方始
豪情減自茲萍蓬逐南北盤錯力扶持豈意登京兆仍然屈有司
高堂緣病免子舍切傷痍松菊催歸去杯棬永慕思園蕪惜已往
陔養憾何追本自韜文采其如迫睫眉窮占命宮蝎懶拂卜居龜
質抱楚和璞才非汝潁錐治生計恆拙走俗去安之一戰猶思霸
多方竟誤棋行藏滯書劍涼燠換裘絺囊粟方飢朔牛車且困尼
未能忘宇宙苦乏蓄梁睢鳳閣虛登籍麟臺阻向葵客嘲供覆瓿

文戰習興戶覽揆生何晚升沈數問誰乾坤幸清晏旅食且安綏